



國朝寶鑑

二十五

宗朝一

76
3059
25





國朝寶鑑卷之七十六

純宗朝一



純宗淵德顯道景仁純禧體聖凝命欽光錫慶
文安武靖憲敬成孝大王

諱^松字公寶庚戌六月十八日丁卯誕降
于昌慶宮之集福軒在位三十四年甲午
十一月十三日甲戌昇遐壽四十五葬仁

陵^{在交河}

正宗大王二十四年庚申六月己卯^{二十}
正宗大王昇遐于昌慶宮之迎春軒越六日



甲申 王世子即位于昌德宮之仁政門尊
睿順聖哲莊僖惠徽翼烈明宣綏敬王大妃
為大王大妃 王妃為王大妃告廟受賀頒
教大赦 綏嬪朴氏寔誕 上即日以 正
宗命 王大妃取以子之定號元子方在娠
宮中有夢龍之瑞 綏嬪神彩比常時益清
已知為大慶之兆誕彌之辰虹流廟井瑞彩
煥爛都人士女奔走詫祝及誕降覃訃岐嶷
降準龍顏方口重頤同符 正廟正廟臨視
喜甚曰是兒福祿非吾比也二歲之至日

正廟嘉添齡賜新曆 上在抱披覽有與屏
上字相同者輒拈指之八歲行諭善相見禮
講讀有程庚申春正月冊王世子仍行冠禮
周旋中規禮儀可象禮既成陪駕謁廟宮
正廟命捲簾使士民仰觀 上坐屹然若巨
人顧眄有度羣情胥慶及 正廟禮陟 上
冲年恤宅宗動罔違禮哀戚過之羣下進見
語及 先王輒泫然流涕掩抑失聲國人服
其至孝用國朝舊典 大王大妃垂簾同聽
政事大小 上皆稟決焉○秋七月 上命

政院代草諭右贊成宋煥箕大司憲李直輔
前諮議宋穉圭使之造朝○八月玉堂聯劄
請開講曰冲齡緝熙之工尤宜惜陰禮經有
未葬讀禮之文古之孝子固未嘗因喪廢學
英廟甲辰公除纔過即行召對 大行朝丙
申公除數日命講禮記此豈非我 殿下所
當鑑法者乎 上優納之○命內閣印進翼
靖公洪鳳漢奏藁教曰我 大行朝親自手
編行將印頒于世者也待畢印以其書致祭
于祠宇○九月掌令吳翰源疏曰臣聞城西

古刹有巫稱薦福僭設鹵簿之儀傳說甚駭
成廟違豫巫女祈禱於近泮之地章甫逐之
聖教若曰士氣如此予疾若瘳士林至今莊
誦今當一初清明之日如此不經之事益加
痛禁焉答曰方令內司嚴查痛禁巫輩令攸
司搜捕遠逐臺閣有此言予喜之○冬十一
月葬 正宗大王于健陵○尊 正宗大王
為世室上護軍宋煥箕疏曰洪惟我 先王
以上聖之姿當君師之位臨御二紀治教休
明遠溯堯舜之道孔孟之學而其所標準必

自朱子始窮天人性命之原興詩書禮樂之教餘事文章自成渾灝所著述為羽翼經傳扶正學以熄邪說明淑慝以靖世道正大之規純粹之行皆可以模範百世若其立仁義之道使天理明而人心正天叙勅而五典惇實惟繼述我 孝廟志事至於初元昭訓揭如日星一部明義炳若春秋維功與德誠無間然尊尚德美加隆廟儀允為有國之縟舉我 先王不祧之禮恐不俟百年而議定也在昔 肅廟朝臣先祖時烈建言請 孝廟

世室遂定隆典 先王盛烈克配 聖祖則豈非今日所可仰述乎答曰 先大王世室之請詢于大臣僉議攸同卿之追先以報極為感歎○命壯勇營所管兩西穀作錢關西十四萬一千餘緡海西四萬四千餘緡特付之該道民庫○追奪洪國榮官爵○施北青等邑滄死人恤典仍命該倅祭之海上

辛酉元年春正月命度支今年經費取用於壯勇營○正宗御真初奉安于顯隆園之齋室至是建殿移奉于行宮之左號曰華寧○罷

內奴婢寺奴婢仍命內司各官房各司奴婢
 案燒火于敦化門外教曰宮寺奴婢之欲罷
 先朝意也予當繼述其令壯營給代仍令文
 任代撰綸音曉諭內需司各道奴婢威興永
 與兩本宮屬奴婢毓祥宮
 宣禧宮明禮宮壽進宮於義宮龍洞宮寧宮
 房各道奴婢合三萬六千九百七十四口案
 冊一百六十卷宗廟署社稷署景慕宮耆老
 所宗親府議政府儀賓府教寧府忠勳府尚
 衣院吏曹戶曹禮曹刑曹義禁府都摠府左
 右巡廳壯勇營內侍府掌隸院司諫院成均
 館弘文館藝文館宗簿寺內膳寺司饗院侍
 講院翊衛司司圍署中學東學南學西學各
 道奴婢合二萬九千九百九十九卷
 三口案冊一千二百九十九卷

○命藥房各道別
 ○西洋學漸
 卜定海錯果實諸種自今永除

滋蔓乃大行鋤治誅其沈溺之尤者改悔者
 宥之仍命諸道常加糾禁逐月登聞著為式
 周文謨本以蘇州入隨使行潛來誑誘男女
 設法教習令軍門集示警衆黃嗣永酷溺邪
 術邀來文謨及逮捕知機亡命潛懷不軌寫
 出帛書有請來海舶之謀將欲傳送洋人其
 排布非諸賊比用大逆律○秋七月印頒
 正宗御定四部手圈○九月命文正公宋時
 烈追配臨漳書院因畿儒疏請也院即朱子
 俎豆之所兼奉 正宗所編兩賢傳心之錄

正宗御製序文曰我朝之有先正猶宋之有朱子也心法所同天地尚不能違况於人乎靖世道息邪說未必不有賴於此○冬十月有雷異減膳責躬教曰冬月之雷灾異也惟予冲人仰庇我 慈聖洪休尚賴二三大臣之老成夙夜兢兢不敢知天之命哲在我初服乃於收藏之節忽有殷殷之響天之示警必有厥咎惕然悚懼無以為喻

壬戌 二年春正月命罷壯勇營教曰壯營將撤罷矣追念昔日予心當作何如仍命校吏之

逋負營貨者並蕩之 大王大妃以營財欲付內帑 上曰營既罷矣庫儲何必留之內府 大王大妃乃命凡有序胥一歸之大農○二月嶺南伯以宜寧縣倉舍及民家失火馳啓 上遣籌司郎慰諭飭道臣措劃顧恤使方農之民得以奠接 上聞燼餘穀將散糶民戶特命蕩之曰可矜哉民情也○夏四月命台對停講之時依古規條進故事講退後如有申奏餘意者并錄以進○命故相臣洪命夏賸享沂川書院○命壬寅死禍人金

龍澤李喜之李天紀沈尚吉鄭麟重特賜褒
贈錄用後孫官人墨世贖還舊第移旌其門
○五月 正宗大王將祔太廟大臣遵舊典
請上 大王大妃王大妃尊號 上亦縷縷
仰勉 王大妃以 先朝不受尊號拒不許
至於却膳涕泣 大王大妃亦不肯受諄教
筵諭辭旨懇惻大臣以為典禮雖重順志為
大只上玉冊金寶○六月飭諭觀象監及諸
道臣外史官凡屬灾異無論大小隨即登聞
○秋八月命閣臣承史每年四孟朔奉審奉

謨堂○祔太廟禮成教曰賀儀已舉其在繼
述之道當仰體昔日愛民如子之盛德仍命
八道舊糴及貢人舊遺在市民徭役懸房贖
並依戊戌年例蠲減○九月命故太學生尹
志述配享四賢祠○冬十月有雷異減膳三
日令大臣言責之臣悉陳修省之要○冊金
氏為王妃御仁政殿受羣臣賀頒赦中外命
貢人舊遺在及諸道搔劣米依己卯例蕩減
市民徭役懸房贖依庚申例除減○遣承旨
致祭于故相金昌集祠版承 慈教也○十

一月行賀禮于仁政殿以疹候平復也

癸亥

三年春正月御進講講詩燕燕 上曰先

君之思以勗寡人此豈非今日君臣上下所當交勉處乎知事金祖淳曰 聖教及此不覺欽仰○二月教曰春寒無異冬沍雨雪殆無虛日嗟我貧民豈能免桂王之歎四山風落自枯之木雖不宜輕斫伐民既困甚散而廣濟有何不可其令各營斫出以救都下薪貴之患工曹參議朴命燮疏言都城四山非比郊鄙澤藪之與芻蕘共者也大庇之惠

恐未能遍及而禁伐之法必從以漸弛之寢成命答曰京山風落之許賣古亦有之爾或不知乎凡物既賤則所彼自廣豈必如是較計然爾言可謂舉職極庸嘉尚○閏月命禁官房衙門庄土陳告之習守令之入於繡啓者殿最居下者錄成冊子以備省閱申嚴貪吏廢錮之法○夏四月平壤府民家失火延燒千餘戶命蠲蕩其戶糴身役無役者代給穀物遣史官徐有恂慰諭灾民飭道臣結構奠接之方既而咸興府民家失火之啓又至

教曰被灾既倍於關西人命致傷過十餘其為驚心錦玉靡安又命內局進上鹿茸停封與內下丹木一萬斤胡椒二千斗逐戶均排每戶給米一斛燒死入原恤典外加給一斛並蠲蕩戶糶身役又命停進獻物膳飭道臣具給家材差校理洪奭周慰諭御史馳往慰諭○詣文廟行酌獻禮試文武科賞泮堂齋任教曰初行釋菜竊寓入學之義也○左議政徐龍輔啓言向奉 慈教矣法從軍啣之差陵園墓享官者令大農量道里給盤纏

上從之仍命獻官軍啣人亦如之○秋八月詣健元陵元陵親祭遣知敦寧府事李彥植敬祭于 德興大院君墓以墓所之密邇於輦路也○遣禮官致祭于道峯石室兩書院○命故相臣李頤命李健命趙泰采特施不祧之典○命遣官致祭于文忠公鄭夢周祠版錄其孫○冬十月特下丹木三千斤胡椒三百斗于沁都補賑資○十二月御進講上出示御製純齋課程仍命領事徐龍輔讀君德篇曰懋德曰孝親曰敬天曰法祖曰愛

民曰用賢曰節財曰勤政曰恭儉曰慎微凡十條目龍輔仰請課程之義 上曰非課讀之謂也近於召對講綱目若有格言或立論而有所撰述也 ○御製有君道篇 上自警之語也其目有八 一曰敬天 二曰愛民 三曰慎祀 四曰篤孝 五曰節儉 六曰任賢 七曰納諫 八曰慎刑 其敬天曰敬天無過於誠 誠則實 人君欲法天為治 捨誠何以哉 古人言天之警告人君如父責子 警即是愛也 英廟五十年御極以敬天二字存心 嘗於大風雨

及日氣乖和時 雖夜必整冠危坐 告左右曰 或予有過失而致此警告乎 仍潛為口祝之 辭皆自警也 靜攝中頻接臣僚於卧内語及於天 輒扶起以致敬 予小子夙夜繼述 哉其愛民曰 列聖相承以愛民為國家之法 民者至愚而神 人君處於九重之中 行仁義無私則民歸 君之所行毫釐未盡 則民畔 民歸民畔如水之流 莫之能禦 人君天之子也 民君之子也 赤子飢寒則其為父母者使之無飢寒 凡人必侮鰥寡孤獨者 無他弱也 故文

王先此四者自古帝王愛民則以哀矜四者為先故其國治矣其慎祀曰祭之以至誠則其祖先必饗我 英考暨 先朝當祭享之時雖小祀必整衣端坐撤享後始寢睡以為常予嘗所仰觀於 先朝矣敢不繼述哉其篤孝曰孝者百行之源也天下之人捨孝不可以為人况人君乎我 列聖至誠之孝當養奉志臨喪哀慟 英廟當誕辰讀蓼莪章於寶慶堂堂即 英廟誕降之堂也 先朝事 殿宮至孝璿源殿景慕宮展拜雖靜攝

時未嘗廢之予所目覩敢不仰體乎其節儉曰人君節儉然後天下亦節儉奢侈者中主之所恥聖主之所斥也粵我 列聖以節儉為家法予亦體念也其任賢曰人君不用賢則小人進用賢則小人退國之治亂係焉其納諫曰君心先正始可聽言君子之言逆君心人君以為非道小人之言順君心人君以為盡忠可不惜哉納諫之道在於虛已虛已之道在於克讓舜温恭故能受無若丹朱傲之戒平治天下予一人以述其慎刑曰刑者

聖主之不得已用也故欽哉欽哉惟刑之恤
哉我先朝當刑官奏讞反覆商量必審必
慎至夜四五鼓不就寢必思可生之道有輕
者赦之實罪疑惟輕之意也○上篤於友愛
妹淑善主下嫁也親製女訓七編女戒六章
以賜之○御進講講詩賓之初筵領事李時
秀曰此詩即衛武公飲酒悔過而作也奏未
畢上曰若是悔過而作則似有失德追悔
之言而一篇之中初無自反之句語此非悔
過之作乃垂戒之詩也時秀曰然矣○仁政

殿災教曰藐予小子叨承堂構之責居常懍
惕若不克負荷今茲回祿之告警在於踐位
行禮之所一則由予否德二則由予否德驚
心之餘繼以悚恧當此非常之灾豈敢狃忽
而自恕減膳五日避殿撤樂凡在論思諫諍
之地者其悉陳厥咎以補予寡昧下綸音諭
京外臣民命停明春陳賀○大王大妃教曰
主上春秋長成聖質天縱德性日就聖學日
進萬幾庶政可以裁察揔斷自今日撤簾

甲子

四年春正月頒勸農綸音曰國以民為本

民以農為本農之本在勤未聞不致人力而能致豐年也省耕補不足不奪民時長吏之勤也俶載南畝深耕易耨民之勤也人力之勤如此然後惟天降康貽我穰穰咨爾方伯居留守土之臣欽哉各盡乃心食哉惟時○御明政殿受百官賀以親總萬幾也○二月加上 大王大妃尊號曰光獻受賀頒赦○三月平壤府火公廨間舍燒燼殆盡至延及崇靈崇仁兩殿 上大驚教曰兩殿延燒既甚驚悚哀我無辜之箕民奠接未幾又遭酷

灾何以為家何以為生差副護軍李相璜慰諭使馳往慰撫仍奉香祝行慰安祭于兩殿及鄉校○江陵三陟襄陽民家火延燒累百戶死者過十人下惻怛之教以校理洪奭周差慰諭御史遣之未幾通川高城失火之啓又至下諭御史一體慰撫仍命蠲蕩諸邑燒戶戶糴身役每戶給米一斛倉穀之燒燼者並蕩之麥錢之歛民者並停之漁船鹽盆之被燒者永免進上物膳特許停捧○關東慰諭御史洪奭周啓言江陵高倫妻權氏原州

朴亨明妻李氏為救其姑赴焰並命請施旌
褒從之○命施忠烈公河緯地祠版不祧之
典○秋八月詣健陵顯隆園親祭○九月大
司諫朴崙壽䟽言辛酉夏權裕䟽附陳都人
以下等句語至有曲突徙薪之喻語甚不道
包藏異圖請嚴鞫得情批許之曰爾言即經
常之論予所痛惡者背馳先王之罪也及
裕徑斃三司言賊裕沮戲大婚之逆節宜追
施孥籍連章爭之 上引 正宗受教其身
已死者追施孥籍除之之文命依丙申九月

尚魯例舉行○冬十月有雷異減膳求言○
十一月命故贊善金元行參判金亮行掌令
閔翼洙判書尹鳳九不待狀議謚○右議政
李敬一啓言贈吏參朴在源戊戌一䟽無愧
古之忠臣義士捐軀而衛國請加贈正卿賜
謚從之○十二月仁政殿成受羣臣賀頒教
中外

乙丑五年春正月御仁政殿親上致詞箋文表
裏于 大王大妃殿惠慶宮仍受賀頒赦
大王大妃寶齡周甲 惠慶宮寶齡望八也

○大王大妃金氏昇遐○二月王堂聯劄請於公除後開講賜批從之○三月上痘候平復將行賀儀禮堂疏請退行於因山後議大臣儒臣教曰既是守經豈容他議依諸議退行右相議中上告不容少緩者是矣告文既已啓下仍行可也至閏六月始行賀禮頒教○前年冬議定大王大妃尊號曰隆仁綈禮未及行至是陳冊寶于殯殿仍行頒教○秋七月行召對上曰敬者主一無適下工何在侍讀官姜世綸曰在學問矣上曰

經傳中言治道多矣從何着工可益於日用行事世綸曰在立志上曰君子小人之分固難辨矣以忠言逆耳之言推之逆耳之言可知為忠言小人則讒諂之態雖若易辨及其當着未免昧於分介何以則明辨耶檢討官李渭達曰當以忠讜諛諛辨之矣○行召對講綱目魏紀上曰魏之所徵者如高允輩誠賢矣外此諸人果皆賢雋冠冕耶王堂姜浚欽曰想皆知名之士矣上曰此等人雖招徠而不能誠心任用以高允之賢而只

國朝寶鑑卷之二十一
十一
為太子僚屬信用不及於崔浩外此諸人亦
不過同拜中書博士而不復進用則徵之亦
何益乎賢人無以自至雖或近在左右不知
其賢則無以盡其才何以則盡知而盡用使
野無遺賢乎浚欽曰 聖教至此不勝欽仰
○行召對待讀官金相休曰人君御世之道
在明示好惡 上曰然漢武帝好經術則董
仲舒之徒進好文學則枚臯相如之徒進好
詼諧則東方朔之徒進好神仙則五利文成
之徒進此果係人主之好惡矣○九月奎章

閣印進 正宗御定大學類義○冬十月教
曰我國科制即治教中一事也科場之不嚴
在於有司之不得其人士習之不正亦由有
司之不得其人可不慎哉仍飭該曹擇擬試
官

丙寅 六年春正月命常參經筵雖非日暖自明
日入稟○上謂承旨曰以親祭時祝文讀御
諱 先朝屢發下教此後讀祝之際讀奏御
諱之意飭諭大祝酌酒之際鬱鬯必為滿盛
○御晝講講論語 上曰禮之用和為貴是

禮為體而樂為用也以和為貴而又以禮節之是樂為體而禮為用也禮主於敬樂主於和以心言之禮當為體樂當為用歟檢討官金相休曰誠如 聖教○三月行台對講綱目至熒惑守南斗移治東城而壓之上曰熒惑守斗不思修德弭災之道以治城壓之者非矣古語云一念之善景星卿雲一念之惡疾風雷雨蓋恐懼修省為弭災之要但此心久則易於怠忽矣○夏四月行台對 上曰君使臣以禮君臣之間不獨以嚴敬為禮

和樂亦為禮大抵一於敬則情志不通一於和則或近褻慢嚴敬和樂兩行不悖然後方可以為禮○命賜金達淳死達淳拜相職請褒朴致遠尹在謙以闡揚 景慕宮容諫之德 上取覽二人上書教曰政院日記入於洗草 先朝所以仰請 英廟所以特許蓋不欲以不忍見不忍提之事留其文蹟於世間也祖子孫自是一體 英廟先朝所以不忍者若施褒贈非但如有得罪恐負 兩朝聖意刑曹參判趙得永上疏討之兩司合啓請

國朝年錄卷之二十六
按律 上曰宋朝寬仁不戮大臣我朝亦不以罪關義理盡置大辟及賓廳屢啓始許之
○左議政李時秀啓言我朝專以士大夫立國雖罪犯惡逆支屬婦女如法連坐而已未嘗慘辱近來連坐婦女發配前拘囚該部或捕廳此法典所無此後應坐者宜令自其家發配永為式從之○五月行台對講國朝實鑑至 世宗朝論刑獄事 上曰刑獄得情難而失中易刑獄之官拘於文法雖知其冤而不敢為屈法原恕之論何以則於文案之

中能察其冤狀耶古語曰臯陶曰殺帝曰宥蓋謂臯陶主於殺而張釋之之為廷尉乃欲寬恕於驚蹕盜器之罪况臯陶之賢者乎宥過無大罪疑惟輕即臯陶贊舜之言則臯陶亦未嘗不依於寬厚矣以今觀之每拘文法輒稱鐵案所謂鐵案者何等獄情也閣臣洪奭周曰一登錄啓謂之鐵案矣臣嘗觀 先朝每於暑節必行審理歲以為課取京外文案反覆詳究竟日達夜 玉色無倦雖已承款已結案不容移易之案無不起疑於無疑

國朝錄事卷之二十一
求生於必死一經御覽幽寃必伸實與天地
同其大矣 上曰不但殺獄而已或有聽斷
不明而滯囚之類則此安得不台傷和氣乎
又教曰惟我 世宗朝聖德治功可謂三代
以後初有猶以果斷事機不及古人為言此
固 聖心之謙抑而後辟之果斷必多不及
尤可不惕然加警乎後世之人果斷固不及
古人當於其不及處勉勉加工以求企及若
以不及古人為當然底事而不復加勉豈所
謂舜何人予何人之意哉 堯周曰 聖教誠

至當 上曰古語云人君千年而遇一相人
臣千年而遇一君君臣相遇自古為難如光
武之於鄧禹亦不多見矣有臣而無君者固
多有之世或稱有君無臣此言何如也 堯周
曰有君無臣之歎古或有之而十室之邑必
有忠信寧有不得一人之理耶亦其求之之
不至好之之不篤 上曰甘露降白鵲見前
此亦有祥瑞而 世宗朝謙挹不受矣夫或
有灾化為祥亦有祥反為灾如上番所陳朝
著清平百姓安謐是為上瑞云者其言果好

國朝寶鑑卷之二十六
大舜之世有景星卿雲之瑞而百工相和而歌舜亦受之以為瑞乎夷周曰只言百工之相和而未聞其進賀於舜矣 上曰用度之有節寔為不易加斂預徵之弊古猶如此而況今日乎何以則無濫用之弊耶王堂李魯益曰濫用之弊實由於奢侈 上曰非但奢侈凡不急之費無用之作初非必有意於奢侈而自歸於用度之無節者亦多古語云宮中好高髻四方高一尺宮中好長袖四方全匹帛又云上有好之者下必有甚焉奢侈儉之

風多係導率之如何用度無節之弊固不敢曰無之反求諸己未嘗不以侈靡為戒而侈風之日滋如此抑或不知之中反有甚焉者乎○行台對講國朝寶鑑至 文宗朝憲臣上疏開言路 上曰上澤下流下情上達此所謂天地交泰之時也然自古以來泰之時常少否之時常多人君孰不知虛受嘉納之為美歷數方冊雖中主以上鮮有不以為難者何以則能盡虛受開納之道歟歷代人主莫不欲治安而不能使言路得通或知言路

之當開而不能使臣下敢言可皆一一指陳
洪奭周曰 聖教及此社稷生靈之福也非
但忠言雖狂率愚妄不中理者曲恕並容然
後可謂虛受 上曰爵位國家之公器為人
主者當公天下之好惡與天下共之公一國
之好惡與一國共之○行召對講國朝實鑑
上曰古人云勞於求賢逸於任人 祖宗朝
求賢之誠篤至故人才衆多顧今抄選中亦
有二三儒賢而誠意未至不能招致如道薦
守令薦之類亦未見有收用之實何以則可

使人才彙征既有舉主則不可不立賞罰之
法乎又教曰此文言得賢用之雖高枕無為
可也雖得賢才亦須聽用其言措諸事為以
天下之耳目為聰明然後可以為治若但高
枕無為賢才雖布列朝廷亦何以收其功乎
又教曰今則清華之職盡歸於闕閱世族踈
遠者得列微官亦無幾何以則踈遠遺逸皆
得進用耶又教曰用人之道或長於補治或
優於武事或鍊於錢穀各任其能然後可以
各得其職若可將而相之可相而將之所用

非其所長而庶事叢脞如此則雖曰勞於求賢而不能逸於任人也○追施金漢祿逆律都承旨金履陽上疏言 英廟辛巳以後金漢祿謀危國本引胡寅論唐中宗事問難於一二知舊率為朱夫子答張敬夫正論所沮有識者固已誅其心而心絕之伏願亟行天討 上召見大臣諸臣教曰纔見知申疏驚怛痛惋之心已無可言祿賊即予不共戴之讎也毋得追施孥戮既有 兩朝受教依尚魯例舉行○六月領議政李秉模啓言故副

提學金時粲以 英廟朝名臣蔚然為搢紳士林之望當漢祿譎張凶言也抗義逆折嚴辭闢廓凶黨為之喪氣是豈但一時衛社之功哉特贈吏曹判書仍施節惠之典修撰金履喬以乃祖之孫積被擯斥今始還朝在聖朝振淹滯扶義理之政特命加資不為無補於世道從之○追施金龜柱逆律大臣及三司以金龜柱倡為八字凶言請追律從之教曰忍當此時其何以上慰 孝安殿在天之靈乎卿等之言如此臺諫之言亦如此不

國朝實錄卷之二十六
幸莫大矣瞻望孝安殿益倍摧咽不可無告
由遣大臣或禮堂朔祭時兼告由○領議政
李秉模啓言保民之要在於吏得其人吏得
其人在於薦得其方薦得其方又在於申嚴
誤薦之罪請依大典所載守令若犯贓污并
坐舉主比犯者減一等 上曰是修明舊典
依卿所奏○秋八月飭科弊教曰赴舉士子
莫非公卿大夫家子弟又莫非他日為公為
卿之人自其為士之時宜各慎身知法以為
四方之矜式而紛競雜還之弊日聞於朝廷

豈非士子羞恥乎昔在 先朝初年申嚴科
規飭令一下士風丕變赴場之士端步無譁
無文筆者不敢生呈券之心為試官者不敢
萌關節之意予自幼少時常常承聞顧予否
德雖不能為君師之責一念繼述之誠豈或
有間監試隔日自公卿大夫各自戒飭其家
人俾無冒犯干紀之弊○九月有雷異 上
曰一陰一陽之失序猶當恐懼修省不敢以
九月十月有間也命減膳三日令中外臣庶
袞闕時政悉言無諱○行別講講貞觀政要

上曰魏徵之疏諫廷諍是非直截可謂盡事君之道太宗有虛襟之量故魏徵亦得以盡言不諱蓋進諫臣下之責也納諫君上之道也若言其難為君難乎為臣難乎承旨李文會曰君臣兩難矣上曰太宗英明之君也濟世安民不在漢文下但無工於學問從事於氣質顧其治有媿皇王只為唐家是可惜也文會曰實非可法者也上曰不然尚論古人宜捨短而取長本源雖有欠政法固可鑑也然堯何人舜何人宋神宗嘗云何敢當

堯舜程子愀然蓋人君做治當以堯舜自期學問之工須下學而上達不可躡等立志則必去堯舜不下一等耳○冬十一月行別講講聖學輯要上曰仁者見之謂之仁知者見之謂之知何為而仁謂仁知謂知耶侍讀官權斌曰稟受有偏全之殊矣上曰人之稟受均得仁義禮智信五性特物欲交蔽不能保其本然之全體耳稟賦之初豈有稟知稟仁之殊耶又教曰太極動而生陽動極而靜靜而生陰靜極復動一動一靜互為其根

蓋動而生陽而動極則復生陰耶熒曰然矣
上曰陽變陰合而生水火木金土與書經所
云水火金木土穀惟修之義同乎否乎熒曰
此五行語其生之序也書之六府語其所以
為用也 上曰以天言之則謂之命以人言
之則謂之性何以而在天謂命在人謂性耶
檢討官金啓河曰自其天之賦與者而言則
曰命自其物之稟受者而言則曰性○行別
講講聖學輯要 上曰性相近也習相遠也
其初皆不甚相遠也習於善則善習於惡則

惡克已復禮註謝氏曰克已須從性偏難克
處克將去其曰須從者指自知其性之偏處
而言也克將去者指力行而言也朱子曰已
之私有三性質之偏一也耳目口鼻之慾二
也人我忌克之私三也蓋性質之偏言其氣
質之性也耳目口鼻之慾言其芻豢悅於口
使令足於前之類也人我忌克勝已者厭之
之謂也克去之功果何以哉閣臣朴宗薰曰
三者之中亦各有偏處偏故難克難克者亦
克則况其易者乎○十二月行別講講聖學

輯要 上曰殷高宗命傳說曰啓乃心沃朕心乃心即傳說自開其心而朕心者望傳說之溉高宗之心者也君德成就予所當勉不必專責於臣僚若臣僚則有啓沃之責須於啓沃二字不宜泛看王堂閣臣等齊奏曰求助之誠責勉之意藹然鄭重誠欽仰萬萬上曰乃字與朕字即指君臣上下而言者也上下交孚則情志流通而為泰之象情志阻隔則上下不孚而為否之象治亂安危之機皆決於此朴宗薰曰君上開懷聽納則未必

人人傳說而後始可啓沃矣

國朝實鑑卷之七十六

國朝實鑑卷之七十七

純宗朝二

丁卯七年春正月命復洪樂任官爵○二月特
贈卒判敦寧府事朴準源上相即日議謚禮
葬依大臣例教曰自庚戌至于今保護祖孫
之親兼輔導之師及至庚申以後大功偉績
可勝言哉予之有今日國之賴太平是誰之
賜○水原留守趙鎮寬以母年大耄上疏陳
情乞解符歸養 上批許之曰任雖不輕情
亦可伸○京畿湖西海西有海溢之灾特遣

國朝實錄卷之二十一
宣傳官慰諭被災民戶○秋八月遣承旨賜祭于率右贊成宋煥箕教曰先正後孫小子師傅學問德望朝野所尊其所禮待事體尤重○命豎碑于華城輦路遲遲臺從承旨申絢言也○命追奪金鍾秀官爵黜廟庭配享三司及賓廳以鍾秀陰襲龜祿之凶言有疑亂矯誣之罪聲討齊發合辭屢請從之○九月命施忠定公皇甫仁忠貞公吳斗寅忠肅公李世華文烈公朴泰輔不祧之典○冬十月上謂兵曹判書韓晚裕曰閩帥國家安

危之所係營將則討捕使也若誤認平民為盜貽害生民多矣須悉此意隨窠精擇○教曰予聞之敬天之怒無敢戲豫敬天之渝無敢馳驅近日彗星告災倘使小子赫然奮勵報答天心則仁愛之天必不如是惟予不穀不思消弭之方因循姑息昨夜燁燁之光轟轟之聲其日立冬之日其月收藏之月也自顧厥由罪先予躬國事之板蕩紀綱之解弛惟予之罪也生民之困瘁風俗之陵夷惟予之罪也惟上天安得不威之警之自今日減

膳三日上自大官下至草野悉言無諱○上御暎花堂召見閣臣承史御射獲五矢命諸臣耦射以豹皮弓矢筒筒賞賜仍宣饌是日陪射諸臣進箋謝 上親受○十一月上夜讀論語浴沂章命院閣上直諸臣各言志以對既對 上親書下政院曰賢臣碩輔為國棟樑猛將智士為國爪牙內以無君臣之所失外以無生民之疾苦閭里聞含哺之聲邊圉無不虞之患是可為大願也

戊辰

八年春三月因內帑綿布罄乏命入兵曹

綿布五十同判書金履翼上疏曰國家經費莫非出於民力不思撙節則害歸於民此漢文帝惜百金之財而為千古賢主者也不敢知今日之用其所當否果何如而恐有乖於節用益民之政乞寢成命 上即命還下賜批曰卿守法舉職如是陳疏可謂朝廷之得人內用雖苟艱豈可一疋留中○先是因邪書之禁並禁燕中購書至是命許經史及醇儒文集○因臺臣進規教曰立志者為學之肯綮也居敬者明理之樞機也明理者吾心

國朝實錄卷之七十一
三十一
之圓鏡也克己者孔聖之心法也紀綱者係一國之安危也節用者在一身之奢儉也立志然後學問進而德業廣可望居敬之效居敬然後心主一而志不擾可期克己之功克己然後天下之人皆與其仁衆物之私不敢勝公至於紀綱之振與不振用度之節與不節特一舉措之如何而已此所謂衆物之表裏精粗無不到吾心之全體大用無不明矣何患乎為國之不治何慮乎一身之不善乎
○夏五月右議政金載瓚啓言故副提學李

秉泰清操苦節無愧古廉吏風裁請贈謚賜侑從之○閏月大司憲李直輔上疏略曰顧今儒學知名之士先以蔭職宣召開其進身之路使周旋誦說之席以盡其蘊抱必有裨益於聖學也答曰欲依卿言廣加抄選卿先即上來責我朝端彼彼選之士亦將相率彈冠而來是予至望也○秋七月王堂任百禧洪儀泳書進故事御筆賜批曰上番陳宋主寬猛得中之諭下番引歷代一治一亂之說古人有言人主一心萬化之原寬過則似

愛民而反有害焉猛過則似擾民而亦有害焉惟寬以示仁猛以示威亦可謂一治之端然非明理使仁威有過錯之歎非學問使邦國有危亂之失予方以兩儒臣之進言參互而體念益勉緝熙之工爾等亦思啓沃之責○九月海伯李義甲啓言谷山岢嵐山太祖大王馳馬基水刺泉有 正宗御筆碑請建閣以庇之從之○冬十月召見平安監司徐榮輔 上曰誠心對揚有弊者必思蘇革之方江界人蓼屢年積弊博採民情善為釐

正且殿最之嚴不嚴方伯之責也榮輔曰本道疆域於彼地只隔一衣帶水風俗自古尚武若復勸獎足為緩急可恃 上曰關西果是關防重地文事雖不可廢武備尤不可忽○戶曹判書李晚秀請申明燕貿紋緞之禁教曰 英廟朝 先朝定式不啻截嚴近來紀綱雖曰掃地豈有以禁令而無所顧忌哉申明舊規無踵前習○行召對講國朝寶鑑上曰不誠無物聖人格語也百千萬事非誠不可做去下手於何許工夫可到誠字上地

位乎格致誠正為誠字上工夫耶閣臣李晚秀曰從事於誠則自無不誠誠固聖人之極工而能格致誠正則誠在其中矣○十一月上御寶文閣行夜對講歷代君鑑上曰冬夜正長筵席從容夜氣清明精神專一讀書則好玩索論事則易領會故古人云夜對勝晝訪此言儘有味矣劇論古今以永今夕不亦樂乎其宜簡其禮貌開懷盡情悉陳無隱仍討論歷代治亂得失人物賢否又詳詢問閭艱難民生疾苦教曰今夜之會予甚樂之

不知為疲使撤御前燭導諸臣歸院時已向曙矣○十二月台對玉堂官因文義上曰詩之兩我公田遂及我私可見治世之氣像以臣言之先公後私為難而上不以先恩而後義則難責下之先公而後私矣○行台對講詩皇皇者華上曰范氏曰臣能從善則可以善君矣臣能聽諫則可以諫君矣蓋謂未有不自治而能正君者人臣自修之道固當如是以人君聽言之道言之不必問其能自治與否也

己巳九年春正月左議政金載瓚啓言贈執義徐德修以達城國舅之孫辛壬誣獄受禍窮酷故相臣閔鎮遠劄陳以為凶徒之誣德修意在誣 聖躬故重臣李台重筵奏以為徐德修特加卓異之典然後辛壬義理始伸特施加贈賜侑故掌令任徵夏丙午一疏與閔鎮遠袖劄同一義理而反為凶徒所構竟至瘦死尚論之士至今嗟惋宜施加贈 上從之載瓚又啓言今年即己巳舊甲也星霜屢迴忠烈如昨先正臣宋時烈故相臣金壽恒

故忠臣吳斗寅李世華朴泰輔家賜侑故參議李后定當日一疏與三忠無異今宜一體致醑從之○二月先是 上臨筵教曰是歲惠慶宮冠禮回甲也當有闡揚徽號之舉而仰體 慈宮謙抑之德只欲行進饌矣大臣金載瓚曰 慈宮以謙抑為德 殿下以將順為孝此事誠有光史冊至是詣景春殿進饌于 惠慶宮述 正廟乙卯延禧堂進饌之禮以體昔日 孝思也○三月先是 上於賓筵教大臣曰 英廟朝命諸道守令作

詩備述稼穡困瘁之狀 先大王亦令製進冊子俾陳諸弊今欲法 兩朝故事使邑倅進詩文欲省覽果有對揚之實效乎金載瓚曰 聖教至此此實生民之福也 上曰此舉專為對揚若以文具不如不為載瓚曰百姓之倒懸莫近日若其必曰我 聖上苟知吾無告之狀必有活我之道若以綸音示誠意惻怛則庶有孚感之效至是下綸音于八道四都曰民惟邦本本固邦寧自古明王莫不以愛民保民為祈天永命之本民也者王

者之天也食也者民之天也若復饑寒勞苦而莫由得達為人君者雖欲愛民保民亦何得哉惟予小子冲齡叨至艱之業德澤無一流於百姓惠化無一布於八方夙宵恐懼慄慄若朽索之御六馬不敢一時輒弛粵在英廟朝五紀治平專在於愛百姓懲貪墨令守宰使之製進民隱詩其切於民弊者除之亦我 先朝凡民之困苦有達于 聖聰即命除之又嘗飭道伯守宰以書以策歷陳農務民情此予小子每思仰法者也咨爾道臣

留守守令以民生之困苦閭里之艱難備陳其由亦具救濟之道若不盡誠實為辜負○夏五月兵曹正郎金秉淵疏陳八條一曰慎法令二曰進人才三曰抑奢侈四曰釐軍政五曰均田賦六曰矯糴弊七曰定砲制八曰慎邊政答曰爾非言官而言辭切於時務如有採納者令廟堂稟處○六月久旱 上親祈雨于南壇御步輿屏繖蓋躬祝押嚴齋令灌薦纔舉靈雨沛然袞衣盡濕都民環瞻至有感激泣下者○飭諸道勸民代播仍令免

稅教曰雜穀雖不如禾賴天之靈善為成就則吾民可以有食此大幸也况 先朝戊午亦有蠲稅之命在今日又為繼述之一事乎○秋七月廟堂請令中外防出穀減其直教曰孟子之移民移粟之對蓋謂不治本而只治末也非謂不可移粟也使今若此土之穀不得賣彼土則是閉糶也自一邑言之境內之民雖重於隣邑之民自朝家視之内外八方之民皆吾赤子古之為將者投醪而飲三軍今邑邑皆不出穀於境外則他邑之民將

益窘急豈不患貧患不均之義也利之所在
刑法不能禁令若勒使減價則令有所不能
行且富者其肯為之積穀乎此亦不可不念
十分講究毋徒擾民○審理中外死囚之久
未決者六十餘案傳生者居三之一○行都
政教曰貪墨成風小民受苦而無所顧忌紀
綱日夷名分倒寘而無所鎮壓况今歲旱為
災三南民事尤不可不顧恤其本顧不在於
守令之善擇而亦不在於政官之誠與不誠
乎守令或有不稱其職政官先當其不擇之

罪○八月初九日丁酉 元子誕生 上詣
仁政殿親上致詞箋文表裏于 王大妃殿
惠慶宮嘉順宮仍受百官賀 嘉順宮上箋
始此命中外凡諸舉行一依 惠慶宮所行
之禮教曰今日之慶即國朝百年內初有之
慶也親上 殿宮之賀箋仍受大庭之祝嵩
天日清和神人胥悅此時蠲恤之政宜及中
外之民諸道舊糴及拯劣米五分一各貢舊
遺在限一萬斛市民徭役限一朔懸房贖限
三十日蕩減以示識喜同慶之意○九月教

曰兩湖慘歉夙宵憧憧食不甘而寢不安揀
荒莫先於紓力紓力莫急於寬賦如糴餉身
布之停蠲代捧等事若拘於常格下不得條
舉上不思濶狹唉彼顛領之類何以支保凡
可以便民益民之事無論有例無例大小巨
細直為陳請仍命各殿官進上三名日方物
物膳朔膳及諸貢獻物種並停封外此享上
納官者之出於民歛者並蠲免○冬十月有
雷異責躬求言○十一月下內帑錢二萬緡
胡椒一千斗丹木五千斤分給湖南湖西京

畿華城補賑資○行召對講詩召旻 上曰
此章言任用小人以致饑饉小人之為害於
國固至此極矣故諸葛亮以君子小人之親
與遠為先後漢興廢之本孰不知小人之不
可用而其進退之際何以則無乘間得進之
患耶侍讀官鄭元容曰取捨之際公明無私
則賢邪易辨而可無淆進謬用之患矣 上
曰饑饉雖是亂世之所致聖人之世亦或有
此患為人君者若值饑饉固不當以聖世之
亦所不免隱然自恕矣元容曰治世雖有饑

國朝金鑑卷之二十一
十一
歲發政施仁而民不饑矣

庚午十年春正月教曰外邑抄飢能無遺漏之患乎均施之方專在守令能誠心調賑則小民庶免溝壑之患若不遵朝令隨現嚴勘仍飭都民發賣救恤之政漏戶無籍者亦令抄入○二月移關西穀四萬五千斛海西穀二萬九千斛于湖南湖西以補賑資備局請以戶惠廳錢代送許之教曰民食以穀不以錢若無穀物從何買遷又當窮春瓶罌俱空上納之穀將何備納綿布代錢不足為均惠湖

南尤甚邑大同米三分一待秋收捧移粟之代錢雖為西民除弊彼兩湖仰哺之類何以為食買穀與販之船使之往來兩湖惟意買賣則亦有所益於南民其飭道臣○三月行召對講孟子上曰齊宣不忍於鷩鷩之牛善心乍發以此心保民則可以王矣故孟子因其善端開導以推恩之方齊王惻隱之心雖乍發而非恒有故政令之間無服膺之效孟子之不遇於齊尚切千古志士之恨矣侍讀官申在明曰聖教至此藹然仁心有以

國朝實錄卷之二十一
仰揣此實生靈之福也○大司憲金履度上
疏略曰近聞新有武藝廳軍兵抄入之舉云
或慮宿衛之疎虞歟抑為觀瞻之貴飾歟伏
見儀衛之盛考之國典有加無損則今日此
舉恐非 殿下之所先務也况今公私匱竭
國計哀痛縱不能汰冗而就簡又豈可無事
而廣費留精神於不急之務耗帑藏於無用
之地為累既大所損不細 上賜批嘉之曰
掖隸抄選非初始之事昔在 先朝有別技
軍武藝出身之名色而因壯營革罷而汰之

故予遵此而行之非耀耳目壯軍威之意是
復舊制也然卿能盡言無諱使予欲無過者
亦卿之忠也誠喜朝廷有直言極諫之臣也
有何惜一隊兵哉方還付訓局玉堂兩司無
一人為予敢言者誠為慨然卿其益盡諫諍
之責○夏五月教曰諸道賑事垂畢麥亦向
熟民情之遑急果何如而不至於捐瘠乎麥
農豐稔可使飢民獲飽而有裕乎雨暘均適
饑饉餘力能使田畝盡闢乎流亡者相率而
還歸鄉里乎癘疫今已乾淨而無札瘥之患

國朝實錄卷之二十一
乎此皆夙宵所憧憧者也哀彼無辜之民慘
經歉荒其幸而免死亡者一則上天之仁二
則上天之仁賴天之仁既千辛萬苦而得生
於冬春之間矣今若不能盡懷保之策不免
既生而復死其不孤天心而失人和乎為方
伯守令者勿以畢賑而放心麥熟而弛慮益
加勉勉於勞來懷保之方俾此遺餘之民得
以安生復業○分遣史官宣傳官看審郊外
麥農○六月護軍李祉永疏進五禮通編草
本批曰此書之命編即我先大王繼述

列聖朝制作為萬世憲章之 聖意也今覽
卿章不勝愴慕卿以耄耄之年克成撰輯之
功予庸嘉歎原書令內閣更加攷證以進仍
命賜虎皮○秋七月命復幸行時講冊載隨
之規○八月教曰守門傳命係是職分若或
踰斯後弊難言今日中官輩傳教之下稱以
辭職云者萬萬寒心此不懲治防微杜漸之
慮將歸掃地當該中官定配○詣健陵顯隆
園親祭仍詣華寧殿行酌獻禮御新豐樓賜
米飢民○九月命高麗忠臣贊成事朴門壽

配享表節祠因儒生疏大臣請之也○王堂
徐長輔書進故事引宋太祖岸幘實儀規諫
之語 上答曰夫尊其威儀所以觀瞻視也
嚴其容顏所以知莊敬也是故君子處幽獨
之際勉勉孜孜能使屋漏不愧而邪僻之氣
莫能入焉此固學問之極要處於是乎修身
之道次第可觀而格致之工庶有其效矣我
列聖朝豐功盛烈聖謨美規何莫非小子晝
宵體服者而其禮接臣隣尤為今日勉則之
事何可以一宋祖窺其巍巍之德也○副校

理金啓河疏略曰殿下臨御臣民一紀于茲
矣所奮發者何事所振作者何業不聞其日
進而惟聞其日退未見其寢昌而惟見其寢
弊廟堂以期會簿書為燮理之本銓曹以排
比彼此為激揚之政訟獄骹骸而干囑日盛
科試淆雜而關節肆行臺閣則緘默作家法
守宰則培克稱幹能奢侈爭尚而瓶罌俱罄
紀綱盡隳而毛髮皆病有一於此亦足召灾
况兼而有之乎 殿下若今日奮勵則明日
必有效矣一事振作則萬事必皆就矣何所

國朝寶鑑卷之七十八
十三
憚而不為乎批曰前日猶有奮發之談陳說
於予者今久未聞矣千羊一狐古主稱道爾
之敢言於是彷彿實踐之工方與爾等交戒
特賜內帑帛一十段以表其直○冬十二月
命施故儒臣李東馳贈節惠之典

國朝寶鑑卷之七十七

國朝寶鑑卷之七十八

純宗朝三

辛未十一年春二月通信使金履喬副使李勉
求往日本對馬島辭陛 上召見勉飭○三
月行召對講詩鹿鳴天保 上曰天保一篇
多言頌禱之意夫人君代天理物愛恤庶
禮待臣隣則羣下亦當勉其君德期望以堯
舜吾君而已且壽祿在天天之感應只係君
德之如何詩人之不先勉戒而必以日月松
栢等語為頌者太涉浮夸三代以前亦如此

乎侍讀官李志淵曰人臣以忠愛之心頌祝
福祿非如後世諂媚之風矣○上嘗於講筵
聞講官所奏鄉軍上番之弊教曰遐鄉貧民
傾產裹足守衛京闕難免寒暑心嘗悶恤寢
食靡甘守衛事重不可廢也顧撫安接騎省
之責也仍飭本兵臣每設小校巡視勞察至
是又令廟堂開坐通衢會鄉民之編屬衛士
者一一曉撫悉詢諸弊論理登聞仰體 英
廟招衛士詢疾苦之聖意也○教曰詩云兼
葭蒼蒼白露為霜有國者不可以無信年來

各道應薦者銓曹不即甄拔實甚悶歎仍飭
銓曹○命雲觀察望災異從實以聞教曰歷
攷前史有災必書近日雖有災異之非常者
雲觀無一警告蓋欲諱灾而然也虹貫等現
著之變固不待書而民皆知之其餘灾異並
不書示全無古人必書灾異使之修省之美
意也○教曰 列朝御製御訓實是後嗣王
鑑法者也欲法堯舜當法祖宗咨爾內閣弘
文儒臣須當御筵之時必舉 列聖朝製訓
敷勉文義○教曰大學賢士之所關德性修

身之根本也世無賢士難以扶持人無德性不能拔萃今之太學諸士果有為國家之所倚賴而拔萃出類者乎警奮讀書躬行操存益為多士誦之○命行祭于崇仁殿教曰關西禮義之地八條敷教至于今民服人信豈非箕子之功乎我朝衣冠文物燦然有備赫然有盛者又豈非箕子之功乎○命八道監司四都留守採民瘼作文以進俾為燕暇常目之資○閏月詣崇政殿進饌于惠慶宮○夏四月御晝講命諸臣敷陳列聖朝故

事侍讀官金啓溫以英廟朝容諫之德為奏上曰人臣之言所難言即書經無若丹朱傲之意也我朝聖神相繼仁政浹洽實配堯舜之德而亦有名賢碩輔之輩出者即君仁則臣直也○別下綸音遣近臣慰諭諸路被災民人○五月御景賢堂召泮宮諸生宣醞教曰表予待士之至意也○六月御德游堂宣醞于兩司諸臣教曰庸表予待臺閣懇切之意卿等思我朝四百餘年鞏基之業由於臺官之直諫也○御景賢堂頒魚果于

國朝實錄卷之二十一
朝官七十七歲以上老人教曰明日即 慈
宮千秋慶節也小子祝岡之忱何年不然今
以適和之餘康安如常當推欣幸之誠以廣
示喜之舉○秋七月飭中外獄囚重者勘處
輕者疏放毋得牽連留滯飭都民調飢之政
廣抄貧戶親臨賜米鄉民之流寓無依者招
集賜米○冬十二月關西土寇洪景來聚黨
劫嘉山郡郡守鄭著死之道啓至 上召見
大臣下詢討賊之策命調發京營軍 上曰
誰可將者左議政金載瓚曰將臣中李堯憲

可任也乃以堯憲為兩西巡撫使賜尚方劍
曰節度使以下不用命者斬軍務皆令便宜
從事旋命堯憲開府京營以徐能輔金啓溫
為從事官先遣中軍朴基豐領軍四哨出征
○以兵曹參判鄭晚錫為關西慰撫使召見
遣之仍命參聞軍務○諭關西道帥臣及士
民曰乃者土賊之變起而清北幾萬生靈入
於塗炭魚肉之中是予之罪也風俗頹敗紀
綱解弛予不能振之民生困瘁墨吏橫恣予
不能察之無一政一事之可以迓續天命允

國朝通志卷之二十一
四
叶民心者書曰萬邦有罪在予一人嗚呼予
豈敢自恕哉彼賊魁之自干天誅予不敢赦
若其隨從之徒大半我赤子原其心寧欲隨
凶魁犯大逆哉特為飢寒所驅迫而凶魁脅
之耳若使無辜橫罹於鋒刃豈曰行天討而
救民命乎其脫身歸順者齒之平民俾復其
業寔是飢民之填於溝壑者必不知幾千百
人唉我民斯何辜于天乃罹此凶念至於此
怛心酸鼻咨爾方伯帥臣克體予哀痛之言
竭心賑恤期於拯活毋俾予重獲戾於天命

民心嗚呼爾西土之人爾無負予而予不克
盡為君之責使爾等遭此板蕩驚動之患予
實負爾等予有何多誥

壬申十二年春正月御仁政殿受百官賀告廟
頒赦 王大妃實齡六旬也○賊入據定州
城又分兵四掠清北諸邑及諸山城皆為賊
巢窟道臣以啓 上促令巡撫軍前進○賊
徒屯聚於博川松林洞口欲犯安州牧使趙
鐘永誓死激衆守埤益固賊徒不敢犯兵使
李海愚遣虞候李海昇咸從府使尹郁烈順

川郡守吳致壽郭山郡守李祐植領軍進擊之賊兵大潰走入定州城捷報至上諭道帥臣曰小醜潢池之弄本不足平惟是昇平日久變起倉卒不知營閫之制勝如何政自憧憧初次交鋒已有勝捷將士之奮氣用命可知此乃卿等措畫得宜之力也殊庸嘉乃然狃於小勝兵家所懼卿等益加謹慎長策取勝期即掃蕩○命償下京各司各營錢十萬緡令均役廳買穀為關西賑資又以慈宮內下穀三千餘斛特給關西補賑糴○教

曰當此歲小子孺慕之慟何可勝言健陵顯隆園華寧殿遣永明尉洪顯周奉審是年正宗誕降回甲也○遣御史金啓溫監賑海西○命加贈鄭著兵曹判書先是命贈著亞卿職致侑錄孤給柩材葬需厚恤妻孥至是道臣以著立懂事實啓言賊警初起吏民驚散著與其父其弟對燭而坐草報巡兵營書賊兵大噪突入執著出以槍劍脅之使降著厲聲叱之遂遇害賊又曳出著父亂加鋒刃著弟以身翼蔽乞代父死著父竟死著弟幾

絕復蘇教曰凜然忠義如見其人重為之惻然傷盡噫不識何狀與唐之顏真卿何異從容就義與國朝宋象賢何異况其父子兄弟之一門遭禍不愧於卞氏兩世何其烈也其父亦贈官並施綽楔之典其弟待闋服調用其返柩過京日遣禮官致祭尋命不待狀議謚後領議政金載瓚言著即先正速後也先正以明倫正義之學貽其雲仍著之父子忠節論其所由来則先正之功也特賜恩侑著父魯當著被劫之時戒之曰勿念爾父母必

善死賊又執魯加刃則罵不絕聲而死請加贈亞卿從之○時海西兵營徵兵守禦上命只留入防軍及精銳卒其餘并罷送○尹郁烈李祐植等進兵擊賊收復郭山宣川義州府尹趙興鎮遣義兵將金見臣領軍將許沆收復龍川鐵山及諸山城於是郭山以北直路遂通獨定州賊據城不出巡撫中軍朴基豐領官軍陣於城外撻川浦召募諸將及灣州將士北關親騎衛并屬巡撫麾下○命授許沆羽林將金見臣宣傳官崔信燁內禁

將崔致倫營將信燁致倫灣府將校有討賊之功也既而教曰金見臣募兵討賊使義州獲全許沆戰鬪居前使清北大路一舉廓清當有次第酬褒之典金見臣特以首先舉義之功關西守令除授○金益淳李章謙鄭敬行鄭聖翰伏誅益淳章謙守土而降賊者也敬行聖翰鐵山武臣而從賊叛者也○官軍攻城召募將諸景彧前鋒將金大宅肉薄先登中丸而死命並贈二品節度使旌閭錄孤尋命加贈景彧統制使大宅南兵使令戶曹

給忠壯公諸沫延謚之需景彧沫之後孫也○飭諸道賑饑及都民恤窮之政教曰關西兵民暴露之苦顛領之患如在目中小將領能與之同甘苦乎方伯守令能勵精於拯濟之方乎諸道賑政必已設施哀彼饑饉之民果不至於顛連溝壑乎殫乃誠力活我赤子毋負予宵旰憧憧之心都民之此時窘急不言可知令賑廳發賣貢市民利益之方廟堂與戶惠堂講究施行○諭關西道帥臣守宰曰定城餘賊之假息肆狡誠不足為憂但

予所怛然怵然者即平民或致無辜而橫罹脅從或至誅殺之濫加也賊之為渠為魁與隨從之甘心同惡者必不過幾許箇外此則皆愚蚩無知之氓為饑寒所迫為威虐所逼耳以聖人泣囚祝網之心推之其實可矜非可怒也原恕而勞恤則皆我親上死長之良民也予雖涼德豈敢不顧諟上天好生之心乎每觀前史為將者或不免以屠戮為事甚則殺害平民虛增首級此皆上千天和下虧人理者也焉有仁人在上不忍於人如彼哉

今王師致討雖是不可已之事以吾民殺吾民何安於心漢光武焚書篋以安反側裴度以皇帝命赦蔡人豈非可法於今日者乎誅戮反輕而招徠為重曉諭為先而奠安為次體予良苦之至意紓予西顧之憂○副修撰朴孝成疏略曰今日台亂豈無其由朝廷之上分朋樹黨營私較重於奉公憂國不及於謀身守宰不知恤民銓家未嘗擇人倉廩空虛無以賑恤器械朽鈍無以攻守 殿下之思聞讜言羣臣之啓發善端此其時矣乃若

恬嬉度日不改前轍臣恐可憂之端不但關西而已上優批嘉納之○以李惟命為關西監賑使○以洪遇燮為關東慰撫使李埴為北關慰撫使并兼監賑別下綸音使之往宣慰恤○遣宣傳官撤送北道親騎衛仍命勞問京鄉諸軍教曰京鄉將士多日暴露安得無饑渴安得無疾病將予此意另加勞問犒饋北道親騎衛為念久留之弊茲令撤送千里往還之苦尤極悶然勞犒之節一例舉行仍飭道伯邑守耕者助糧勸作死者搜訪

掩埋戰亡者別致顧恤厚撫妻孥輕罪繫獄者即為疏放○二月上以西土之饑饉師旅又下責躬之教以拯救之方飭諭道帥臣仍命凡係進獻等出於民者限年豐蠲免舊糴停退者并蕩減又教曰軍布既用其力不宜疊徵其役徵兵邑身布并蠲減凡民事之可陳聞者雖格外條列馳啓○命海西湖南三稅京畿尤甚邑鎮各樣徵納並停退以兩道饑荒而海西兼有徵發之擾也○遣宣傳官勞問陣上將率仍為犒饋義州義兵將

別為勞慰○削巡撫中軍朴基豐職以柳孝源代之先是基豐攻城屢不利王堂上疏劾之請更遣有才略者廟議以為基豐誠有頓兵翫寇之罪臨陣易將非制勝之良策也至是敗報又至有是命○寧邊軍梁同郭山之戰為賊所執罵賊不屈賊以刃三斫其頸僵仆于地賊認死而棄去同幾絕復蘇道臣以啓命給復特授邊將○訓局軍李長甲德山陞戶砲手也自願從征攻城之日挺身先登中丸被傷南門之役又終日力戰而死事聞

趙鐘永勞問犒其軍○上候久靡寧藥院輪直至是平復禮曹請陳賀 上不許大臣言如此大慶上告下布不容少遲 上曰姑俟賊平可也居數日大臣又登筵力請始許之御仁政殿受百官賀告廟頒赦前後陳賀諸道方物物膳並命停止以歲歉也○夏四月辛酉大軍收復定州城柳孝源指授諸將方略築闔於東城為障蔽掘土於北城為地道埋火藥從傍穴燃之少頃火發城崩守堞賊皆壓死餘皆奔竄大陣整兵入城四圍搜捕

洪景來中九而斃斬首函上其餘賊首生擒者並檻車載上教曰官軍久為暴露宵旰憧憧捷音忽至萬萬快幸諸將之功極庸嘉乃亂平之後安民為急民邑復舊之政論功行賞之舉十分得宜然後可以慰西民之心令廟堂申飭道帥臣講究舉行○行平賊陳賀于仁政殿頒教中外○五月台見時原任大臣李時秀等曰豫建儲位歷代之所急先務元子尺衣漸長睿質夙就迨此定位允合禮典 上入告于 慈殿慈宮教曰元子年紀

命贈邊將厚施調恤○三月發宣惠廳及各營錢二十一萬緡分送關西海西買穀添糴為兩道調餉賑饑也○命各邑義兵令道帥臣勞慰犒饋所募壯士軍官另加軫恤時清南北十三邑義兵共一千二百五十名○京兆尹金履翼上疏請都下流民設幕饋粥批許之令五部抄流民令賑恤廳招集於通廣空廡設粥分饋仍厚給糧資定差負領付於近道設賑邑一例哺饋待麥熟還送本土使各復舊業所抄京鄉饑民共三千餘口○命

城內外癘疫死亡者備給掩埋之需病而無依者別加顧恤○賊出城劫寨許沆挺身突入賊陣手劍斬賊所向披靡賊從後刺馬馬蹶沆徒步殺四賊竟被創死教曰許沆之奮不顧身直前殺賊忠義凜然命贈統制使旌閭錄孤賜醑戰亡軍卒并厚殮返葬優恤其妻孥沆妻金氏聞其夫立懂矢心下從及葬絕粒而死事聞命旌其閭○時熊岳副都統鳳凰城守尉以皇旨領弁兵到中江為聲援所調八處兵共數千名云上遣安州牧使

漸長以為王世子冊封吉日擇八又教曰冊封時設都監例也而切勿張大○丁丑巡撫中軍柳孝源軍還命巡撫使兵曹判書各營大將迎勞犒饋仍往教場周示賊馘又遣承旨行出征將士內犒饋召見巡撫使及中軍上問孝源曰軍兵被傷者無多乎孝源曰略有傷損而比諸元摠所減無多也○前掌令韓浩運定州人也自京西下直至城門外曉賊以逆順之義賊揪入城內脅使降浩運怒叱賊賊遂斬之定州士人白慶翰倡義旅迎

國朝實錄卷之二十一
官軍為賊所獲賊亂加酷刑慶翰大罵不屈
死並贈亞卿旌閭錄孤安州人林之煥忠愍
公慶業後也自願赴戰持密檄徵兵間行龍
川義剛為賊所執之煥厲聲叱曰吾是忠臣
之孫雖鋸解決不屈賊令斬之之煥謂當上
見天日仰卧不伏踢倒賊徒罵不絕口既被
戕怒猶勃勃事聞教曰臨死不屈其凜然氣
習足以驚賊膽而動耳目初贈兵曹參議又
旌其閭庀恤醑侑尋命加贈從二品職○六
月初 上命錄勲以李堯憲為元勲堯憲以

無汗馬勞力辭 上旋寢錄勲之命令廟堂
論賞李堯憲超正二品階柳孝源加資出征
戮力之諸將守城捍禦之諸倅賜爵秩璽書
表裏弓箭筒箇有差出戰京鄉軍分等施賞
戰亡者別加恩卹以殺降過多革孝源職以
許沆立懂時按兵不救其傍軍將領並施軍
罰○教曰亂之初作雖予否德所致為監司
守令者若或殫誠愛民凶魁亦何以煽動平
民之樂業乎風俗之奢侈守令之貪濫何時
不當懲戢而在今大亂新平之日百姓復業

專倚於此可不十分惕念哉僧巫卜相雜術之誑誤民俗者並宜一切禁斷白骨徵布黃口充丁切可矜憫足以上干天和並申飭八路道帥臣守宰今番殉節人子孫年歲居住詳探作冊上送以備參考殉節人子孫關西人成功者文官承文分館武官宣薦通融清族之有才行可合擇用者亦如是永為定式京鄉校率効勞者亦皆酬庸望單實蹟懸註以入今日國事真所謂因之以饑饉加之以師旅也國用蕩竭此政節用之時也有司之

臣凡於供需日用之物不拘重大論理省約亂平之後民生之憂甚於亂平之前每一思之錦玉靡安今此縷縷下教即予懲毖大綱之教也○領議政金載瓚言西土之人知忠君死長即清南北諸義士之功也諸義士之能辦此箇義舉乃壬辰四忠臣有以倡之也先正臣趙憲故忠臣高敬命金千鎰郭再祐妥靈之所降香賜祭收錄其祀孫宜也 上從之○召見忠清兵使金見臣 上問其年又問爾老母安在教曰爾為國家成大功予

甚嘉尚特除爾制閫之任往哉必善修其職
見臣既退又教曰臣子之急亂効力即古今
之秉彛然苟非忠勇無以辦得仍賜田結奴
婢及衣物○召見輪對官京兆郎言閭巷侈
靡之弊 上曰侈風之禁即 祖宗朝關和
今雖另飭豈有加於此者乎上下各自遵守
不敢踰越犯者法官以其法處之○行都政
教銓官曰懲貪風恤民隱為懲創後一大新
政自今犯贓污為繡貶道罷者一切勿擬字
收之任○秋七月御仁政殿冊王世子受百

官賀告廟頒赦教曰日吉辰良冊儲禮成此
乃皇天 祖宗篤佑積慶於邦家者也上而
供 殿宮嘉悅之歡下而答臣民欣告之心
况凡百儀節皆用己卯庚申之例子小子不
洎之慟又如庚申冊禮時 聖教矣諸道舊
糴十萬斛貢人舊遺在一萬斛市民徭役限
二朔泮人徭役限三十日蕩減已已以後遇
歉諸道停退軍布錢分數減蠲結錢僧役稅
錢貢錢一體量減此即予小子仰述廣慶而
不敢有過之意也○守令有辭陞者教曰當

國朝實錄卷之二十一
召見而因雨勢未果各於下去後悉心奉公務盡職事之意自政院一一飭諭○遣大臣攝行酌獻禮于永禧殿教曰是年是月即我聖祖開邦正位之八回甲也佐命諸勲臣不可無酬酢之舉開國一等功臣諸人令該曹訪問其祠版所在遣官致侑以示逢此日曠感之意○奏請正使李時秀辭陛上召見時秀以保嗇 聖躬頻接儒臣陳勉又曰王世子蒙養之方專在 聖上之身教居處凡百務從儉約亦是養正之道也 上嘉納

之○八月行晝講講詩葛覃 上曰葛覃即后妃親執女功之辭何以則後世崇儉之俗可如此乎王堂鄭元容曰此在人主躬率之如何葛覃之美亦由於文王之化也○重臣李冕膺李勉競韓晚裕卒逝教曰一月之內重臣三人相繼卒逝朝著之上老成之人殆若空虛予心若有所失以予此心優老之典宜有拔例大臣卿宰年七十以上人遣醫官問其疾病有無以來及醫官書啓有疾人令內局給藥物其餘令戶曹賜饌物○九月大

臣以關西民情筵白 上曰西土民事眷眷之念日夜不弛豈可一刻遲緩乎當下綸音矣仍教曰關西受糴之民加之以兵燹因之以饑饉癘疫哀彼死亡已矣無論惟此餘存之民尤何忍以隣族責納乎絕戶所受新舊糴穀并蕩減俾關西生死之民并沾朝家惠澤○關西道臣究覈從賊諸囚以啓 上慮有鍛鍊枉罹之患下教飭廟堂平反尋命道臣酌處教曰小民無知其順與逆皆從於上之道導率耳何可以向來脅從之類人人責以

忠義配之誅之哉道臣當專唐憲宗赦蔡人宋太祖赦江南之意以欽恤之道疏決萬一違此使予於後世當為何如主哉道臣躬持獄簿從速決放○分遣繡衣廉察湖南嶺南海西關西北關○命關西民之流散各道者給糧還送本土○上將幸健陵已有成命大臣以靜攝之餘上劄請寢 上賜答不許曰當此年小子情理豈有曠省之心哉旋因慈殿慈宮懇請力挽遂寢之二十二日親行酌獻禮于璿源殿教曰今年今月小子孺慕

愈往未逮初擬拜謁仙寢伸一分衷情事勢拘掣不得行禮瞻望梧雲不勝慟缺之心仍命華留鎮南樓前庭聚會四民賜米六十一歲人給米布境內儒武依別試例設場試取居首人賜第本府市民徭役限一朔蠲減○命京兆抄啓朝官六十一歲人卿宰遣京兆郎存問曾經 正宗朝侍從臣宣傳官人加資其餘文蔭武官并令該曹給食物○命關西漁鹽船稅四分一蠲蕩封進馬停免○冬十月詣健元陵行酌獻禮以歲歉命凡百策

應務從省約咸興永興璿派孫令銓曹隨窠調用○行賀禮于仁政殿告廟頒赦 惠慶宮患候平復也○領議政金載瓚言年來遇慶晉秩者太疊且驟至有旬日之內自三司躡躋亞卿者非所以慎重爵賞也 上是其言○龍山坊民家失火命宣傳官往視慰撫○十一月有雷異減膳求言大臣金載瓚等聯劄略曰我 殿下以明睿之姿承艱大之業勤學恤民夙夜靡懈此正大有為之會也獨奈慶事常主寬容注措太欠勇斷此豈非

國朝實錄卷之二十一
先正所謂有可致至治之幾而遲疑不進者
耶萬化之源一下工夫則悅天心鞏邦基亶
由於此 上答曰予小子對越恐懼亶由上
天之所諄諄然教者也由予否德無前之灾
荐逢於連年卿等眷眷之言深可欽念卿等
益加對揚是又予日夕之望也○弘文館上
劄言昨日開講今日停講非所以遇灾修省
上答曰適因感候未及召接當俟數日開筵
○大臣奏言明年癸酉即 王大妃實甲重
回之年請舉賀儀進豐呈 上曰當仰稟

慈殿既而教曰小子自內縷縷仰達而 慈
殿斷斷不聽在小子養志之誠奉承而已且
年凶歲饑 慈心尤以是牢拒下情雖缺然
進饌置之只行賀儀以伸祝慶之誠○十二
月三南兩西關東沁都饑給穀湖西八千斛
湖南三萬五千斛嶺南九萬斛關西二萬六
千斛海西一萬斛錢一萬五千緡關東七千
斛沁都一千二百斛賑之

國朝寶鑑卷之七十八

國朝寶鑑卷之七十九

純宗朝四

癸酉十三年春正月詣仁政殿陳賀于王大
 妃殿仍御殿受百官賀告廟頒赦朝臣年六
 十一歲文侍從蔭牧使武邊禦以上人並加
 資其餘賜食物○夏四月 王世子行師傅
 賓客相見禮開書筵 上引見大臣金載瓚
 韓用龜等以蒙養身教慎揀宮僚陳勉 上
 嘉納之載瓚繼陳 列聖朝早諭之道曰伏
 聞有書筵待下教之命竊以為雖不必逐日

國朝實錄卷之二十一
三講一日一講率以為常講筵之外頻召入直春桂坊使之日親左右宜也 上是其言命日行書筵頻接官僚○革自作魚面江口神方廟坡五鎮以別害為獨鎮五鎮及別害原屬三水府及厚州設鎮五鎮在內服而無益於關防也○教曰今月十九日西賊平定之日也昨卒死於王事者各令地方官致祭收用軍功之飭非止一再者念其敵愾奮義之勞也令兩銓隨闕錄用又命許沆遺孀月給米布○飭養正齋修葺守護之節齋即故

宰臣趙希逸私第 仁元王后誕降之所
英宗嘗駕臨 正宗隨詣楫間奉揭 正宗
宸翰○五月分遣宣傳官看審畿內農形○
六月原州民有子代其父誣服殺人者因推
十餘年及其父死道臣得其實以聞 上命
宥之曰替父自服一辭不變其誠孝足樹風
聲○築全州府南固山城設鎮置別將城在
萬馬谷當南路之衝為全州咽喉道臣李相
璜設施經紀至是功告訖○教曰此月孺慕
萬萬難抑 先大王御製庚申後即當奉印

而至今未遑事體情理俱缺然內閣擇日舉行仍下帑儲為印書之費仰追先朝不煩經費之聖慮也○遣青城尉沈能建攝行毓祥宮酌獻禮封園舊甲之年月也○秋九月命文任撰定州戰亡將士紀蹟碑文依平壤愍忠壇東萊義士塚例築壇碑傍每以破城之日設祭侑酌歲以為常○飭關西掩骼之政○冬十月贈故巡撫中軍柳孝源正卿職從領議政金載瓚筮白也○十一月有雷異減膳撤樂三日○教曰慈殿寶齡光躋周

天虹流慶節日以近屆予小子愛日祝岡之心曷以形容大臣以陳賀進宴為請此即我家典禮予小子伸誠飾慶之道亦在於此慈心以諸路荐歉縷縷牢拒謙光之至德恤民之息言丁寧懇惻在小子養志之道承順為大飾慶反小進宴寢之當自內進饌以表微誠仍命陳賀時各道方物物膳只進於慈殿○十二月詣仁政殿陳賀于王大妃殿仍御殿受百官賀告廟頒赦○濟州民有潛謀據島作亂者守臣捕其魁以聞教曰亂

民謀變可見失其彞性苟使前後長吏明其教化勤其勞來人知親上死長之義官無剝割侵漁之政豈至有此等變恠一則朝廷之失二則朝廷之失何獨誅愚蚩頑蠢之亂民哉一邊鋤治一邊懷保脅從咸與惟新平民察其疾苦使霜雪雨露并行而不相悖然後可使耽羅一方轉危為安仍遣察理使李在秀按覈慰諭試取儒武廉訪茂才特行○京畿湖西嶺南關東關北饑降綸音慰諭給穀京畿三千斛江華一千二百斛湖西一萬斛

嶺南二萬三千斛關東一萬六千六百斛關北三萬五千斛賑之

甲戌十四年春正月詣仁政殿陳賀于 惠慶宮仍御殿受賀告廟頒赦 慈宮寶齡八旬也○詣璿源殿行酌獻禮 英宗誕降再回甲也○二月致侑于驪陽府院君閔維重故相臣閔鼎重閔鎮遠祠版 仁顯王后復位之再回甲年與月也○夏五月旱命審理京外獄囚○六月賜祭于忠獻公朴在源祠版○內閣印進 正宗御製弘齋全書共一百

冊又以詩文各編合附於 列聖御製共二
十二冊又奉印 莊獻世子睿製三冊藏于
奉謨堂宙合樓景慕宮之望廟樓華寧殿文
獻閣五處史庫外奎章閣校正監印諸臣施
賞有差○秋七月諸路穡事灾荒講備豫之
政羨京外留儲錢令戶曹宣惠廳買兩西穀
十萬斛又飭北關交濟穀關東各邑穀先期
準備待春船運從領議政金載瓚言也○八
月嶺南諸邑大水 上降旨蠲恤下綸音遣
承旨徐春輔慰諭被灾民人○冬十二月命

都下貧民抄戶發賣又命抄流丐饋粥每朔
排巡以為式疾病者救療死亡者收瘞○畿
內三南大無關東關北亦饑給穀京畿三萬
三千斛水原四千二百斛江華二千斛廣州
一千八百斛湖西四萬八千斛湖南七萬斛
錢七萬緡嶺南二十五萬斛錢六萬緡關東
七千四百斛關北五千七百斛賑之命嶺南
湖南三名日方物物膳節扇甲冑停封補賑
下綸音慰諭諸道饑民頒內帑銀子五千兩
丹木八千斤胡椒五百斗均給諸道○行都

政飭清北七義士後裔搜訪收用○上候自
九月靡寧至是平復

乙亥十五年春正月行賀禮于仁政殿告廟頒
赦 惠慶宮寶齡望九也○行 上候平復
陳賀于仁政殿告廟頒赦○召見大臣備堂
領議政金載瓚奏曰今日賓對即 聖候遙
復後為政之一初也春寒尚峭調護宜慎六
對三講雖未如例必於便殿卧內頻接大小
臣僚諮訪軍國訃謨時召儒臣講讀經史則
有補於治法政謨 上曰卿言好矣載瓚曰

王世子講學屢月停撤請益加勸勉敦台山
林耆德使之出入書筵 上嘉納○命都下
流丐之自外方來者定差負領付原籍官京
居者自賑恤廳日給乾糧至麥熟而止○三
月命春宮書筵值齋日以台對行之賓客依
法講例入參值陵廟修改日過修改時刻行
之遵 英宗正宗兩朝聖教也○關東北船
穀之南運者敗二萬餘斛 上大驚命取嶺
南營邑所在銀錢布及京司所納錢布買穀
充其數仍命兩道船格等無問生死應納漁

鹽稅并蕩減○夏五月癘疫熾行命別設禳祭都下病民令活人署惠民署救療○久旱命入義禁府刑曹徒流案及捕盜廳文案關係逆獄邪學以外徒流人并放送又飭秋官審理冤獄○光陵陵上莎草失火遣大臣禮堂奉審變服避正殿減膳撤樂三日○分遣史官看審四郊雨澤農形○冬十月行賀禮于仁政殿告廟頒赦 惠慶宮患候平復也○遣大臣攝行酌獻禮于永禧殿 太祖誕降舊甲之年月也○十二月 惠嬪薨服制

定大功禮曹啓言各 殿官服制五禮儀及喪禮補編無可據之文係是國朝初有之變禮請議大臣儒賢館閣堂上領議政金載瓚議漢宣帝悼園定禮程子斷之曰為人後者謂其所生者為伯叔父母然所生之義至尊至大雖當專意於正統豈得盡絕於私恩降其服以正統緒皆為齊衰不杖朞而別之以明其與諸伯叔父母不同也朱子特書於正史昭垂於後世此乃邦禮私禮元無不同者也 仁廟朝 啓運官服制下廷臣議先正

臣金長生以為當稱伯叔父母當服不杖暮
聖祖亟從之為本生父母服如此則於本生
祖父母服隨而遞降可推以知領中樞府事
李時秀議昔我先朝即祚初元特降不貳
本綸音宮園祝式一遵程叔子定論蓋嚴於
統緒別嫌明微莫如程子而程子之論曰為
人後者謂所生為伯叔父母而為齊衰不杖
暮此指儀禮為人後者為本生父母報服而
言也儀禮所載雖曰士禮程子所論乃是邦
禮惟茲喪禮若在我先朝在宥之時則亦

必一遵程子定論然則今日服制當有不易
之禮矣左議政韓用龜右議政金思穆鰲息
君李敬一內閣提學徐榮輔南公轍直提學
金履喬議亦同上曰本生降等通上下一
也雖無於禮以今日罔極之情昔年追慕之
心當起義而服制况有程朱定論大臣館閣
之意又如此即以本生降等磨鍊○內下銀
三萬兩諭提護使曰昔年聖孝為甲子年
需用儲置者也以此銀用於今日大事實為
闡述未伸之聖心也○教大臣禮堂曰予

方受服而朝臣華服未安自上服盡前朝臣服淺淡何如大臣李時秀等議自上視事不御常服而諸臣赴公遽用吉着有乖從上之義朝臣服淺淡有異於服制無碍於禮節禮曹判書鄭尚愚參判尹魯東議亦同參議權丕應議坤殿春宮服制五月三月之後皆從吉惟於進見時用玉色受服之殿宮猶復從吉不受服之廷臣仍用淺淡服及有輕重不得之歎上從大臣議○分遣繡衣廉察三南北關

丙子十六年春正月禮曹以殯宮率哭前太廟大享時第十五室用樂當否請議大臣李時秀等議迎神進饌撤籩豆送神登歌軒架例皆合奏於各室獻爵之時獨停於當室其可曰不用樂乎郊而格廟而饗惟樂為重不祭則已祭則不可不用樂用樂則又不可獨停於當室矣內小喪公除後行祭如常載於補編受教而英廟辛未之事即子婦喪因小喪而停大享怵然於聖心令我聖上所處之地與聖祖辛未大異况於第十五室

並享之時薦以牲牢奏以磬筦必有怵然於
聖心人情未安則神理之未安從可推知恐
不得不停享十五室若停享則各室享禮亦
不可不並停 上曰卒哭前十五室用樂大
為未安而五禮儀舊典也大臣之議皆如此
謹依施行○給穀一萬五千斛賑嶺南五邑
饑民○左賓客沈象奎奏曰 王世子三日
公除後以吉服莅講賓僚以淺淡服入對一
堂上下俱有違於從上之義請議大臣領中
樞府事李時秀議 世子服制乃是總三月

雖於公除之後燕居與臨講恐不當遽從純
吉不但進見時之當用淺淡服而已領議政
金載瓚議竊覲 殿下便殿召接之時以布
袍帶臨筵而 世子獨於雷肆莅講服吉服
非從上之制也左議政韓用龜右議政金思
穆議亦同 上從之○三月祔葬 獻敬惠
嬪于顯隆園○秋八月 上以服制撤軒架
鼓吹禮官據掌故言除服後樂當陳作惟於
魂宮行禮出還宮時當陳而不作 上命待
祔宮後禮曹堂上上疏言禮不得中斯為失

國朝實錄卷之二十九
禮軒懸之待祔不陳恐不合於禮之中玉堂
又聯劄爭之 上不從至小祥後宗伯又登
筵力請始許之○先是禮曹參判金垵上疏
言先正臣文純公李滉倡明正學名儒碩士
代不絕教故能不為詖淫所動 先大王曠
感於先正之餘教特命賜祭今日嶺人之始
終全節莫非 先王作興之遺化及今邪獄
鋤治之時請依 先朝故事且故參議李象
靖窮性理之學興起斯文宜別舉曠典以樹
風聲 上優批嘉納至是命致祭文純公祠

版贈象靖職○冬十月蠲蕩定州流戶糶穀
五千九百斛○十一月水原留守徐榮輔臨
幸上疏請輔導元良曰古昔先王養正作聖
之方詳載於保傅傳一篇而程子所謂接賢
士大夫時多接宦官宮妾時少即進德之要
訣也 上賜批嘉納諭以切實

丁丑十七年春二月詣宗廟景慕宮展拜 王
世子隨詣行廟謁禮○詣健陵顯隆園親祭
試取本府儒武召見父老賜米○三月 王
世子詣文廟謁聖行入學禮 上御仁政殿

受賀頒教領中樞府事李時秀等進曰惟我春宮邸下薦酌先聖橫經講席揖讓進退禮儀粲然時敏日新之學此政其時鈔選端方文學之士日開講筵在外儒臣益加敦召至若遇物而誨先事而導惟在 殿下身教上嘉納○秋七月三南水民戶漂頽及人命湮沒者甚多道啓連至命道臣優加庇恤特蠲其戶糴身布○命減襄陽貢麥之半

戊寅十八年春二月麗王諸陵之在開城者歲遠荒廢耕樵不禁至有犯葬者 上聞之教

曰前朝陵寢 列聖朝所以崇奉之典至矣且犯葬於帝王陵墓之內者非彞性所為仍切責留守及經歷罷其職遣禮官奉審申明禮官三年一奉審之規又令每年秋經歷遍審以聞高陽等地所在麗王陵禮郎一體奉審又教曰王氏子孫無立朝者該曹探訪調用以示朝家不忘王氏之意○夏四月判敦寧李晚秀疏辭官啣賜批曰卿即予舊學也又為輔導元良豈不貴乎○命京外審理獄案○六月命侍講院 列朝寶鑑及誌狀中

抄撮謨訓要語以備春宮睿覽書成名曰謨
訓輯要用右相南公轍言也○秋九月命抄
選經筵官仍兼書筵官俾出入於延英銅龍
之席政府銓曹以吳熙常李友信應薦上
諭召敦飭熙常友信并䟽辭不至上賜批
諭以必致之意○冬十月判中樞府事韓用
龜使瀋陽還奏曰故義州府尹趙興鎮往年
賊變矢死守城倡義士討賊宜有褒贈之典
也命贈吏曹判書用龜又請贈參判韓浩運
子初仕調用從之○十一月右議政南公轍

啓言泮長與禮議通清之分為兩歧先朝
聖意專出於文學政事各取所長而俗尚不
古以要津為進取之榮途故泮長反為厭避
之窠亞銓之階以經筵三銓之階以泮長請
如舊例從之

巳卯十九年春二月行王世子冠禮于景賢
堂上御崇政殿受賀頒赦教曰國有大慶
而惠不及民誰與為慶命施蠲惠于貢市民
及諸道舊糶有差○夏四月詣宗廟璿源殿
景慕宮展拜王世子隨詣行禮冠禮後初

國朝寶鑑卷之二十九
一三一
謁也○閏月是年即嘉順宮五旬也始以誕辰陳賀有成命既而教曰今年異於他年欲伸區區之誠慈宮大以為不安屢形辭教撝謙之德豈勝欽仰強而行之非所以揚徽順志之道賀儀其權停○六月命加贈贈承旨梁山壽正卿職仍賜謚山壽世所稱晉州三壯士之一而湖南御史趙萬永請之也○秋七月湖西大水民家漂頽者二千餘戶以承旨鄭元容為慰諭使使之遍審公州等八邑灾形別加蠲恤其餘三十九邑鎮遣備

邊郎一體慰諭仍下綸音頒內帑錢一千五百緡丹木一千斤白礬二百斤俵給灾戶渰死人收瘞後令地方官各設祭於厲壇及復命上召見元容詳問列邑灾形淺深仍命被灾邑糴餉分數蠲減京司納綿布分數代錢蠲浦民漁鹽之稅特給米二千斛以哺灾民移湖南秋年二千斛使之及時耕播○九月命前朝直提學金若時賜謚以遜跡貞節也○冬十月有雷異減膳求言大臣聯劄陳勉答曰予小子寡昧不德自知不足以悅豫

天欣慰答臣民尚賴卿等輔佐之力庶幾維
持於今日今天彰威以警于寡昧慄慄危懼
之心其敢自寧所陳袞闕時弊言言切當奮
發誠實之勉益見卿等憂愛之忠悃敢不拜
昌而服膺思所以自勉○冊趙氏為王世子
嬪御崇政殿受賀頒赦○十一月 上詣宗
廟璿源殿景慕宮展謁 王世子世子嬪隨
詣行禮○十二月命移湖南穀一萬斛于湖
西俾作調資

庚辰

二十年夏四月執義吳熙常疏陳

睿學

輔導之方答曰今欲求正人君子孰有賢於
如爾林下諸人孰如身親出入於离筵雷肆
之間以行其言乎○秋七月价川郡大水以
直閣鄭基善為慰諭御史厚加調恤又命本
道進貢鹿茸停其半以其費分給灾民○冬
十月秋曹啓言許秘婢夫毆辱秘父終至撞
損秘挺打其婢夫致斃請用毆死雇工之律
教曰婢夫之手犯有關風化許秘之奮挺出
於衛父刑推放送○十一月教曰明年我
慈殿舟梁滿六十年之歲而三揀之周甲也

懽忭慶祝曷有其已再明年稱賀有不敢仰請明年正月上日以舟梁六十年當陳賀親上表裏上告下布以伸區區之情

辛巳

二十一年春正月

上詣仁政殿上致詞

箋文表裏于

王大妃殿

王世子隨詣行

禮受百官賀頌赦○

三月己未

王大妃金

氏昇遐

上哀慕如庚申議上徽號曰睿敬

慈粹謚曰孝懿當禮祔於健陵領敦寧府事金祖淳上疏略曰臣於健陵宅兆常有憂懼菟結者昔宋朱文公議永阜陵狀有曰宜得

吉土以奉衣冠之藏垂裕後昆永永無極又曰凡擇地者必先論其主勢之強弱風氣之聚散水土之淺深穴道之偏正力量之全否然後可以較其地之美惡臣竊嘗以文公之言潛心默驗則健陵宅兆之憂悚者甚多今者不幸奄值大故本陵年運不合新卜吉兆一日為急封標之地必有安吉之兆十百勝於健陵者在矣卜灤水之遷行魯祔之禮則吉慶麻廕福祚長流 聖子神孫克昌克蕃宗廟血食萬年之計將莫急於此答曰 大

行大妃平日以是大憂屢為下教於小子今見卿疏尤不勝摧咽悶悚即令大臣卿宰詢議以奏及議奏教曰盈庭之議無一異同登筵齊奏皆請遄斷是謂大同遷奉之禮今已敬定凡百應行之節待新陵卜吉舉行○夏四月禮曹以遷陵時舉哀成服等節問議大臣以啓教曰緬禮王朝既無古制只是援用士禮曾聞士大夫家緬禮時破舊墳與改葬之期相距在三月之內則舉哀成服行於破舊墳之日若前期幾朔或經年始為改葬則

只告事由動塚舉哀受服在於出柩之日者即通行之禮也士與王朝固無異同况諸議如此自今凡有緬禮啓陵與遷奉日字相距不遠則舉哀成服若相遠則用今例事載之謄錄○五月先是有自燕肆購來皇清通考新編者其載本朝辛丑四大臣事誣巖失實行護軍尹命烈上疏言辛壬之禍尚忍言哉倘非四大臣拚死竭力贊成建儲之大策四百年宗社何得有今日乎方其建儲之初凶徒之觀望專在於奏請之偉或不準欲為其

國朝實錄卷之二十一
一
所欲為及其使事既竣窮寇計急則粧出虎
龍之變書忠賢盡椽 儲位幾傾鍛鍊羅織
以成一時之誣案賊輝撰奏逆彥奉使必欲
播天下而欺後世 英廟踐阼之後義理始
明幽寃伊白則誣奏辨正之議亟發於廷而
聖祖之心以含忍為德置之無辨然當日
聖慮若及於今日彼中之有此書則安得以
不許其辨之也至於我 先王凡所以明忠
逆嚴淑慝者無所不用其極而獨不及辨此
者亦惟以 聖祖之心為心而已然 聖慮

若及於今日彼中之有此書則亦安得以辨
之不早 懿元兩朝授受之光明如日中天
丕顯東土而因此一書之謬載萬或一黠昧
於天下後世則腐心之痛鑠骨之寃豈獨四
臣之受厚誣而已哉乞詢大臣卿宰特馳一
介之使悉陳事情請其刊改答曰昨見卿疏
取覽原書不覺慄然辨奏之請卿言是矣係
是 兩聖朝鄭重之事不敢造次當否令時
原任大臣九卿館閣六曹堂上三司諸臣詢
議仍命撰出辨誣奏文專价賚送翌年陳奏

國朝實錄卷之二十一
正使李好敏等以通考改正本賚來乃告于
太廟致祭于四大臣祠版使臣并加資○命
東宮法講以台對代行侍講院以因山前開
講有列聖朝已例仰請也○六月下內帑
銀一萬兩教曰已酉遷園時凡百工役之費
皆以帑儲內下此先朝無窮之睿孝而聖
意亦有所寓也今遷奉之禮事體與已酉不
同然仰想昔年事係華城不欲一毫貽弊之
聖心不可不思繼述之道○禮曹以舊陵遷
奉新陵合祔時服總服表當否請問議諸大

臣館閣堂上領中樞府事李時秀議兩梓宮
奉下既在同時無周旋改服之暇事體禮意
重在緬服判中樞府事徐龍輔議我東先賢
之論多以為緬服雖輕自是斬衰之餘據此
說以緬服行禮庶不失為尊尊之義諸議亦
同命依大臣議○遣宣傳官遍察四郊農形
及都下民家頽壓以大雨時行也○秋七月
大水上曰遇灾恤刑水旱何間仍飭秋曹
三堂赴衙疏決又令審理京外重囚○八月
時有一種恠疾起自關西熾蔓于海西及京

城其證類急癘嬰之則死者十八九 上見西伯狀啓大驚惕教曰今年水灾關西偏酷民不可聊生而邪沴之氣又成輪行之病死亡不可紀極此皆予否德在上不能致和使天災流行也怵然媿悚寢食不安國有大禘祈禳禮也平壤府厲壇及牧丹峯大同江降香祝以寧邊府使鄭元容及道伯與道内秩高守令為獻官寧邊府使仍兼慰諭使行祭後仍為慰諭諸民○都下旬日之間死亡以萬計 上大加憂厲廣施隱恤既命別行厲

祭又特遣亞卿遍祈諸山川○健陵玄和將出 上有幸陵之命時中外沴疾方熾時原任大臣上劄請寢成命答曰疾病目下之預慮也情理人子之所不能已豈可以未形之事廢當然之禮乎竟因諸大臣求對力請始還寢○九月遷奉健陵于顯隆園西岡 孝懿王后祔焉時遍審封標竟得吉地於園寢數里之内咸曰於神理人情允叶及舊陵啓隧果有水患咸曰天意實非偶然此乃 聖上誠孝之感也○命嶺南列邑設行別厲祭

以有輪行疾也○命各傍僵屍令賑廳埋瘞
○冬十月有雷異教曰半夜轟燁聲光殆是
夏節所罕災不虛生必有所召况向來稔沴
已是無前變怪旱澇相仍歲又大饑今又告
警如此悚慄之心豈敢自弛自今日減膳五
日上自承弼以至庶僚其各無隱進言以為
匡救之方消弭之策○十二月劃給關西賑
穀四千斛俾補賑資

國朝寶鑑卷之七十九

